

NSA' NGA NJÚ TE PA MFÉÉ KÊT MÚN NYÜTU

NJÚE ME SHÚKÉT

Lo' te ka kúmshe nga wúme, yúe a njit ne gú púen te ngúet púen nyütu pua pa mféé kêr'ap ngúenengúe sebe, pe na yire mbe map(ureyúe'ne) kú ghét ngam pua sappé ne fúeshe te njú na, lo' te ka fét kwen pua tâne pa mféé kêt mún nyütu kpa' nkiére gú ngétne nga pâre yúe a mfiébe

Wupme pa te njú na, pua ka tuo tuo njú mfé ira yúe púen nyütu ntuo pe ne kú shúkét pua kú wúshe te túm túme puô pua ngúe', shi na mbe pô yi nsa' me pum yu sha' múm nyütu na,

Lo' te ka a nta' mi pa mféékê mún nyütu kpa' mbe yu shi te nsa'ngu mféékê me shi' mi a me yétne yi njit mún nyütu me ndîni ne pi' tu te nsa'kpen pua yit mún te ngu na,

Lo' te ka a ntá suo nshi' shâne sun ma fâne túm túm ma,

Lo' te ka, te mâ kèn, túm túm te nda shut ngu ngu mbône kpa' mbit nféére pentú yap te map map mféékê mún nyütu, lo'te wúme pua nga'két mbe mún nyütu, te ngúenengúe pa mféékê pemba pua pemgbié mbi pit nsa' ndîshut te yi ndùere tam kut te wume la' pua yi mféére fuomkét fuomkét mmanjé wume te ndà lône kú ghét ngam ma.

Lo' te ka gú nsa' ngu ngu kpa' nsèn te pamme mbuo pua nda nshùt ngumbône, yi mbe ngum nshin pa mféékê mún nyütu pua map map kú ghét ngam ma,

Lo' te ka yi nyéte mbuomshe shire shire pa mféékê pua pa kú ghékét ngam pe na pô nga ngüre te yi ngüre yire yi gbèt kèn nsebe na,

Puomshe Mbadem mún

nâ tupshe yire yi nsa' nga njú, ti pa mféékê mún nyütu, po yúe wupme ndi nshur'úe a nta'mi gú túm túm pua ngu ngu yétne yi ngum pô nshin na, me shi'mi gú púen ne gú pe kpúere púen te la', yúe pe nshüşh' yire yi nsa' ngam me wupme na, pe ne ma'si' te yu lére puo kúú wupme, a yétne fa pé, lo'te ndi ngam membéte, túm te ngu ngu pua fâne ngu ngu, lo' te kúmshe pua shétte te ngétne nga mbône mún nsebe ngúe ngúe me rü pa te ngu ngu nda shút puonepuo pua fâne nsié ngu ngu shúe pe nsa'na.

Pum mgbetî 1

Pe nâ mvé gú puen nyütu pô te mbe kú ghét ngam pua ngúenengúe mbe te wúme nsebe pua pa mféékê. Pen â ntúm te mbe kú rem ngam pua fabshe ngam, a nshi njîr'ap ne yi nshâne ngétne nga shap pô te wupme pontâ.

Mgbetî mbète 2

Nshié mún yétne yi ngét kú ñwet te gú pa mféékê pua kú ghét ngam túm te yire yi nsa' nga njú, shi mshié nsènte me túm, me ngup, me sù, me shùket, me nga nyinyi, me nda ntañ, ké mo' nshié wupme túm lo'te la' ké lo' te fâne púen'e, lo' te nkap, lo' te vé ké lo' te mo' nshié mbe.

Mo' nké nshié nsènte ntap ndo' tèr'i mo' ngâ shi te mgbète ntañ, mgbète kèn ké mgbète fâne túm túm ngu ké sâ ngu múm nyütu, pa yúe yire ngu ké sâ ngu mbe ne shùtu na, nshin nsa' mo' ngu na, shi pe ne kú ghét ngam ké mbe pô ne pâshe shútu na.

Mgbetî mbète 3

Nshié mún nyütu ghét mféé kêt wume, mféé kêt kú ghét ngam pua mféé kêt tènntúúm wume te mbe mi.

Mgbetî mbète 4

Mo' nshié mún ntap ndo' pe'i mkpèn ké te mbe fa'kpèn ne, me nga kâ kpèn pua ntèn kpèn ka kpa' njié kèn te gú mbe map mentèn na.

Mgbetî mbète 5

Mo' nshié múm nyütu ntap ndo' pi' kwete'i ngúe' menduwan.

Mgbetî mbète 6

Nshié mún ghét mféé kêt wúme ntu nté ni pue nkèn te gú li' mentèn.

Mgbetî mbète 7

Gú púen kpa' na mbe pô ngúe ngúe mesù kèn mbi pit ngékét mféé kêt shi nsènte mbe te ka kèn ntúe'she wap ngúenengúe na. Gú yap ghékét ngúenengúe mféé kêt ntúe'she me shi' yi nkú' ranami yúe a nte pe nsúene yire nsa' ngam ma, mo' nké yétne yi nèn nshié rône yúe a nsúshe rane-mi na.

#### Mgbètí mbète 8

Nshié mún pua ne mféé kêt yi mfa ñwer'i tu gû nda sa' ngu yúe a yétne yi mfèr'i te map map pa mféé kêt'i túm te mà kèn ké kèn ngu.

#### Mgbètí mbète 9

Nshié mún mà njetne' i yi mbe yu vé te kû tú mo' mún, ké yi mshüshü' i, ké yi ntúme'i te ngu.

#### Mgbètí mbète 10

Nshié mún nyütu ghét mféé kêt, ngúenengúe nsebe, ne ka pe njetne yi nju' mbie'ne sa' shi me ndô ngúere te nda sa' shütu shi nga rane-mi ntúúm ña yúe pe ntuo li sa, tupshe pa mféé kêt'i pua kêt'i na, ké yi ntupshe mgbú sa' shi yúe a ntuo suo'i ne sa' na.

#### Mgbètí mbète 11

Nshié mún'úe pe nsôme'i na, pum na mbe ndi' pô ngâ gbú sa', kúka kèn ki're nguo kwete mgbú sa' shi te nda sa', me ndô ngúere, ña yúe loya njétne yi mfèr'i pôkéri na.

Pe ntap ndo' suo'i sa' ndun nshié mún, lo' te ngékét pua shu shi ghet ké shu shi rié, fú' yié ka a ndi' pô fubkèn túm te kèn ngu ke' ken njú mansié. Mo' nké shi pe mbi' ndo' njap nsuo sa' ndun mún à rét nja' yúe a pambi té mbe yi mgbète te fú' fubkén na.

#### Mgbètí mbète 12

Nshié mún yié ndi' yúe pe ndo' mbe mbib'i ne yi lo' nyî te nga wumeshi yi'she, pa nshut nda'i, li' shu'i ké lérewa shi, shi ñúshe ntu nté mi pua ngétne nga shi yi mbôkét. Nshié mún nyütu ghét mféé kêt túe'she lo' puo kén meshi' yi nkú yúe pe mbe mbib'i ké yi mbe ñúshe' i ne.

#### Mgbètí mbète 13

Nshié mún nyütu ghét mféé kêt ghét kú yi nkétne ne yi nsho' li' shu'i (nka'shi) te nshié ngu.

Nshié mún nyütu ghét mféé kêt yi ntúm nshié ngu, mbû ngu'i, mbit nkú njétne yi mbùtne ntúúm.

#### Mgbètí mbète 14

Te ka pe mbe nta' vé mún na, mbû i ghét mféé kêt yi nta' li' kebkebe mbit, nkú kwete li' kebkebe te shimo' ngu.

Yire yi mféé kêt ndi' yu rié te pa vévé yúe mún ghét püü ngúre na, ké te ngétne nga yúe a ndi' yùni pua nsa' nga njú mansié na.

#### Mgbètí mbète 15

Nshié mún nyütu ghét mféé kêt yi mbe ntúmsié ndi' la'.

A ndi yétne ne yúe pe nkuot ntúmsié la' puo mún, ké yúe pe nkuot mféé kêt yi kupshe ntúmsié la'pue'i nâ.

#### Mgbètí mbète 16

Lo' te lúm li, membâ po memgbié nghétkét mféé kêt yi ndâme mbit njétne yi nsèn ngùet mún, shi tié nto'ne nga túm, nga la' púen ké nga nyinyi púen ne. Pe ghét kêt na mféé kêt te lam pô ngúenengùe, lo' te wume lam pua fú' yié ka pe ño lam ma.

Kutlam shu na pô te ndi' nshut pua pééme pè'ghâ yi ndâme.

Ngúet mún pua nki map mbadem mún lo' fem nshin mo'nké mbi ghét mféé kêt kwete shi lo' puo mbadem mún pua nsa'ngu.

#### Mgbètí mbète 17

Nshié mún, yi'she ké me rû púen ne, ghét mféé kêt ghét kú yi yúm.

Pe mà njétni yi nvé mún nkuot kú yu'i.

#### Mgbètí mbète 18

Nshié mún nyütu ghét mféé kêt kú rem ngam, yi, ne nga nyinyi; yire yi ntupshe yi ngét kú kupshe nga nyinyi ké ghét kú ghét nga nyinyi yi'she ké te puomshe me ndôngúere ké me lúemshe, lo' te yu lére, gû ngéri, fa ngúre ne nyinyi pua ghét gû mgbète ntuot nga nyinyi.

#### Mgbètí mbète 19

Nshié mún pua ne mféé kêt ghét kú ghét wupme ne yi nshúkére, yire yi ntupshe mféé kêt yi mbe shi yétne yi kwete nkamkét ngam me shi' gû wupme shi ne mféé kêt yi njétne yi nta' yi nkweite mbit nsam gû pesa'kúe pua wupme te nshié manjé yi nsâme.

#### Mgbètí mbète 20

Nshié mún pua ne mféé kêt ghét kú ghét puomshe ne ghét nda nshút puomshe te fùeshe.

Pe fa pe yié yîri mún i pe mún nda puomshe.

#### Mgbètí mbète 21

Nshié mún ghét mféé kêt yi nshâre tésù te pesa'kúe npa ngu'i, ké me mún nténe, ké njem púenpúe pe sha' sh sh na.

Nshié mún ghét mféé kêt yi ngét ntu nté te nsa'ngu'i lo'te ngúenengúe mgbète kèn yi kwete.

Kú ntú pa te ngu pe na yire mbe meyùe'ne (to'she) ne pâwa nsa'ngu. Yire yi kú ntúúm pe nâ yitkéri te nshôshî pô lo' te shisho' nzènkét te gû pe rap fù', nère nshié mún sho' yi ngúengúe yié momap, me lúem ké yúe pe nsho 'mo' nza féénî shi yît mún mbe na.

#### Mgbètí mbète 22

Nshié mún, me rû lala pa te ngu, ghét mféé kêt yi mbe ne tèn ntúúm wume mb ne mún. A nâ tèt ngâ shi lo'te yi kwete lúúm ntúúm pa mféé kêt shùshù' mbèt pam, fâne púen te la' ne nga yi ntuet púen yúe a nkpa'she njit te nga wúme shi na, pua nga lúere púnte ntu nté mi na, lo' te ma'si' ngu pua shâne wume ngu ngu, mbe njùe'ne te nga yi nsh she ne nga mbètpam nshié ngu.

#### Mgbètí mbète 23

Nshié mún nyütu ghét mféé kêt fa', kú sho' fa' shi, lo'te mgbète fa' yùe a pua yi ghapshe ngúe ngúe ne shîre lem túúm pua yi nèn manjé ne nga shu ndem na.

Gú pùen ghétkét mféé kêt ngúenengúe péé te ngúenengúe fa' shi rane mi mbe.

Nshié ngâ fa' ghét mféé kêt péé a pe yétni mbit mbe yi shîre ntúúm mbe nshâre'i pua ngùr'i te wume yúe a yùne pua wúme ndun mún nyütu na, nzîshîpe yi mbe nsham pa mebú're te shimo'mmanjé yiéka a ntâne na.

Nshié mún ghét mféé kêt yi njùp nda nshút tùe'she sée mbètpam pua shimo' pùen mbi pit njétne yi nyi te shire shúe nda shút meshi' tùe'she sée shi.

#### Mgbètí mbète 24

Nshié mún ghét mféé kêt gbùne ñwet pua pa fône fú'ndem ntamme pékét mgbète fú' fa'ne ngab ngab'úe a pua yi péé te pe rap fú' na.

#### Mgbètí mbète 25

Nshié mún pua ne mféé kêt kwete ntu nté wume njétne a pe yi fú'she njap ñwet, nshu mbôkér'i ne shi ngúer'i, ntamme meshi' njùpayù, ma'shùe', nda nshu, yüre shi, lâne pe fa' fèt pùen te la', yùe pe ghét shèt nga shi na I ghét mféé kêt puo-ghâme nsa'ngu me yúe i mbe shi fa' na te ya na, ne kúlúemshe na, te kûü na, te réne na ké te shi mo' mbe yúe kú wume sié puo'i, lo'te nkamkét ngam'úe a ndi' te kú ntú'i na.

Nda vé pua pon kpa'she ngét mféé kêt yi nkweite ghâme ne mfère yúe a pua shéttî na. Gû pon, mbû pon njem nâ ngum nshin ngúenengúe túe'she pa te la'.

#### Mgbètí mbète 26

Nshié mún nyütu ghét mféé kêt yu lére (kúú wupme). A nâ njit mi kúú wupme pe pô ndem ndem, nkúeshî yétne yi mbe yu lére me njiéshî (pum yu lére) yúe a pua meyùe'ne mbit mbe nkparé'na. Njiéshe yu lére pua pô yitkéri. Yu lére ntu mbue ne yi yi fa' nâ njit mi pe sâm. mbe njit yúp ndalérewa ngutngûre me nsa'ne ne púen me mfù' kú ngur'ap.

A nâ njit mi yu lére pe nshééne runkét fú'she ntu nté mún nyütu ne suo kú yi mfa puô pa mféé kêt mún nyütu ne mkpara' fône kú ghét ngam. A nâ njit lúere nju'ngam mûmshe ne sun me fâne ngu ngu ne gú lap lap túm túm ké nga nyinyi, shi lâne tamkut te ngétne nga nda shút ngu ngu mbône, meshi' shùshù' fùeshe.

Pa mvévé, te fakú, ghétkét mféé kêt yi nsho' nga yu lére yùe pe yétne yi mfa ne pon pap na.

#### Mgbètí mbète 27

Nshié mún ghét mféé kêt yi ngum fúeshî tu wume ntuot mbône mún, yi nsée te pa ghére ntu mbue ne

yi ndù'nga wuo nkú sú te yi yu ghére pua ngambôkér'i.

Nshié mún ghét mféé kêt yi kwete tùe'she te séé nga ntuot pua mbètpam tùm te yu fù'she yi yi yu ghére, yi yi yu tùete ke yi yi yu ghére ntu mbue yúe i ghét na.

Mgbètî mbète 28

Nshié mún ghét mféé kèr'ùe a mbe nsa' lo' te fâne púen pua ngu ngu, mgbète kèn kùka pa mféé kêt pua kú ghétkét ngam te yire yi nsa' nga njú njetne yi mbe wumkéri ntúúm na.

Mgbètî mbète 29

mún nyütü ghét kup kup mfa mfe ndun mbône mún ña yúe a li mî fône pua runkét tamkut te ntu nté mî yétne yi mbe na.

Te rûne pa mféé kèr'i pua lúúm ntúúm te kwete kú ghétkét nga shi, nshié mún ña mkpem ñwor'i te ndút ndút kén meshi' wúme pua fa puô pa mféé kêt pua kú ghét ngam ne montâ a lo' mfa pû ne ndû nga kúú wupme ngambôkét, mgbète nga nsa'ngu ne nshubôkét mbadem mún te ngu shûtu.

A mâ njétni mi shire pa mféé kêt pua kú ghét ngam lo' mbe mfa'ne pua gû pa sha'ne gû mgbète nsa' ngam nda shùt ngu ngu mbône.

Mgbètî mbète 30

Mo' nshié me yúe'ne lo' te yire yi nsa' ngam mâ njetni suo kú nshié nsa' ngu, lap lap pùen ké ndi mún ne, ne yi ngét nshié mféé kêt te ghét pesa'kúe yúe pe fa a nyé're pa mféé kêt puo kú ghétkét ngam'ùe pe ntanke ntúúm ma.